

Karl Ettlinger (1882-1939)

Die Beleidigungsklag

- Der Hannes is e Schdeuweeos,
Sei Hern is klää, sei Schnawwel groß,
E Schnut hat der, e Deiwelsschnut,
Besonnersch wann er schenne dhut.
- 5 Jinst säggt der Kerl von ugefähr,
Daß ich e ahler Esel wär,
E Aff, e Heuochs, e Mandrill,
Korz, was der Mensch nor hawwe will.
No, ich, net faul, wie der so schennt,
- 10 Bin bei mein Rechtsaawalt gerennt,
Dhu dem verglickern die Geschicht,
Unn sag: des Oos muß vor's Gericht!
– »Ja,« säggt er druff, »da werd was draus!
Drum ricke Se zeh Mark eraus
- 15 Als Kostevorschuß, her damit.
Des is bei dene Sache Sitt!«
Acht Woche druff war der Dermin,
Ich denk: Jetz leiht der Hannes drin,
Doch ward derr die Geschicht verdagt,
- 20 Weil merr noch e paar Zeige braacht.
Unn daderzu – sonst dhut's net klappe –
Hatt ich finf Märkcher ze berappe.
– Am nächste Morje hat's geschellt.
Da schdeht e Kerl, unn der will Geld,
- 25 Er dhut die Nos nach owwe ziehe:
»Finf Mark for Koste dhät ich kriehe,
Berappe Se's, des is Ihr Flicht,
Ich komm derr nemlich vom Gericht.«
»Zum Deiwel,« schrie ich da empeert,
- 30 »Des is doch ääfach unerheert,
Weil mich der Hannes Esel schennt,
Wer' ich machulle noch am End.
Zeh Märkcher hier, finf Märkcher do,
Wie lang geht des noch weiter so?
- 35 Finf Märkcher do, finf Märkcher hier,
Bin ich em Rothschild sei Kassier?
Jetz haww ich zwanzig Mark geblecht –
Ich *bin* e Ochs' – der Hans hat *Recht!*

(242 words)

Quelle: <https://www.projekt-gutenberg.org/ettlingk/frankfor/chap033.html>